

**TEZAUUR LITURGIC**  
**16 SEPTEMBRIE**

**ACATISTUL**  
**SF. CNEAGHINE-**  
**MUCENIȚE**  
**LUDMILA**  
**A CEHIEI**



**MOSCOVA, 2000**



## **Акафист**

# **святой мученице благоверной княгине Людмиле Чешской**

### **Кондак 1**

---

Избранная Богом от иноверного языческаго рода чешскаго, призванная в язык свят, служительнице новая благодати, святая всехвальная мученице Христова Людмиле, во страдании твоём мученический венец нетленный приявша от руки Вседержителя и со Ангелы ныне предстоящая Его Престолу, песнями восхваляем тя любовью, угоднице Христова, и молим ти ся: молитвами твоими от вечных мук, бед и скорбей свободдай ны, зовущия:

Радуйся, блаженная княгине Людмиле, святая мученице и молитвеннице о душах наших.

### **Икос 1**

---

Ангелов сожительница и человеков заступница воистину явилася еси, мученице Людмиле достохвальная, благоволением всех

Творца, Христа Бога, Егоже возлюбила еси и за Негоже пострадала еси даже до смерти во исповедании непоколебимем; темже приими от нас сия хваления:

Радуйся, скорби многия за имя Господне приявшая; радуйся, венцем исповедническим от Бога украшенная. Радуйся, мучеников совельнице; радуйся, веры христианския небоязненная проповеднице. Радуйся, яко тленное богатство свое раздавала еси нищим; радуйся, за неже нетленное обретшая на Небеси. Радуйся, душу свою Христа ради погубившая, во еже спасти ю; радуйся, аки светило, во тьме нечестия преславно возсиявшая.

Радуйся, блаженная княгине Людмиле, святая мученице и молитвеннице о душах наших.

## **Кондак 2**

Видя Христос Господь душу твою, ко приятию семене Слова Божия чистотою и милостынею предуготовленную, светом познания Своего просвети ю, блаженная Людмила, и спасаемых части сотвори ты общницу в Небесном Царствии, идеже со Ангелы поеши Пресвятей Троице песнь: Аллилуия.

## Икос 2

Разум богопросвещенный даровася тебе, святая мученице Людмиле, имже ясно проразумела еси тщету душепагубную зловерия невестки твоея, хотящая тя погубити. Ты же, ведящи сие, удалилася еси во град Тетин, укрытися спасения ради души твоея, Христа же взыскати потщалася еси вседушне. Темже зываем ти:

Радуйся, блаженная последовательнице Христова; радуйся, любительнице заповедей Его преискренняя. Радуйся, всемогущую силу благодати Христовы познавшая; радуйся, лютаго демонскаго рабства избегшая. Радуйся, богатство земное ни во чтоже вменившая; радуйся, от юности идолослужение презревшая. Радуйся, руками убогих сокровища твоя горе предпославшая; радуйся, идолослужительныя люди к Истинному Богу призвавшая.

Радуйся, блаженная княгине Людмиле, святая мученице и молитвеннице о душах наших.

## Кондак 3

Сила благодати Божия осени тя, блаженная Людмиле, егда приясте Святое Крещение с

супругом твоим Боривоем (Борживоем), князем чешским, во Имя Отца и Сына и Святаго Духа. Таяже сила Божия осени тя ко благочестию и научи тя славити Единого Бога и воспевати Ему: Аллилуия.

### **Икос 3**

---

Имущи неоскудное милосердие ко всякому человеку, но более к присным, святая блаженная княгине Людмиле, в страхе Божиим воспитывающа чада твоя, явилася еси добрая прамати внука твоего, святого князя Вячеслава, воспитавши его во благочестии; помози и нам, мученице Христова, прейти сие земное поприще во благом делании, да величаем тя звании сими:

Радуйся, блаженная мати Людмиле, мученице Христова; радуйся, понесшая вдовство твое благочестно и преславно. Радуйся, по смерти князя, супруга твоего, воли Божией предавшаяся; радуйся, яко и нам помощница являеши в скорбех наших. Радуйся, в нуждах наших обращаться к Богу нас научающая; радуйся, внука твоего, святого князя Вячеслава, в истинах веры воспитавшая. Радуйся, яко и той прият мученическую кончину, якоже и ты,

прамати его; радуйся, яко вам за сие уготовано сокровище вечных благ.

Радуйся, блаженная княгине Людмиле, святая мученице и молитвеннице о душах наших.

#### **Кондак 4**

---

Бурею одержима помышлений злобных, нечестивая невестка твоя смятется зело, видевши ты верную рабу Христову, в вере и благочестии просвещающую страну Чешскую, низлагающую идольския храмы и созидающую христианския, во еже славословити Трисвятое Имя Божие и пети хвалебную песнь Тому: Аллилуия.

#### **Икос 4**

---

Слышавши от святого равноапостольнаго Мефодия, архиепископа Моравскаго, слово о чистоте, посте, молитве и о всех добродетелех, христианом подобающих, прияла еси в сердце свое, и за сия добродетели возлюби тя Господь и даде ти крепость и силу. Темже и нас научи, блаженная Людмиле, заповеди Господни исполняти и тебе величати:

Радуйся, усердная слушательнице словес Божественных; радуйся, ревностная исполнительнице закона Христова. Радуйся,

ниву сердца твоего очистившая от терния душевредных страстей; радуйся, оросившая ю слезами покаяния. Радуйся, во вдовстве чистоту непорочно сохранившая; радуйся, воздержанием, молитвою и мученическим подвигом Богу угодившая. Радуйся, страданием сочетающаяся Христу; радуйся, избавляющая от бед и скорбей веру и любовь к тебе имущих.

Радуйся, блаженная княгине Людмиле, святая мученице и молитвеннице о душах наших.

### **Кондак 5**

---

Боготечная звезда явилася еси, святая княгине мученице Людмиле, егда боготканною одеждею святаго Крещения облекшися и нетленною пищею Пречистаго Тела и Крове Христовы духовно укрепльшися, прилепилася еси всем сердцем твоим ко Единому Иисусу; темже вся страна Чешская, просвещенная тобою, едиными усты поет Богу: Аллилуия.

### **Икос 5**

---

Видевши, святая блаженная княгине Людмиле, вся люди земли Чешския во тьме идолослужения погруженныя, усердно потщалася еси просветити тех светом Христовы

веры, подвижающихся в созидании храмов Божиих и в укреплении веры православных в стране чешстей; мы же воспеваем и величаем тя тако:

Радуйся, мудрыми глаголы поучавшая люди оставить тьму языческаго нечестия; радуйся, от Бога токмо, а не от человек, утешение в скорбех искати нас научающая. Радуйся, внука твоего Вячеслава научившая поклоняться Единому и Истинному Богу; радуйся, яко тем сестра являешися равноапостольней Ользе, княгине Российстей. Радуйся, ум твой выну горе имевшая; радуйся, сердце твое жилище Святаго Духа соделавшая. Радуйся, Христу Богу Человеколюбцу всю себя предавшая; радуйся, первая от земли Чешския к лику святых причтенная.

Радуйся, блаженная княгине Людмиле, святая мученице и молитвеннице о душах наших.

### **Кондак 6**

Проповедником духоносным, апостолом, подражавши, блаженная Людмила, славная княгине, твоими слезными молитвами оросила и облагоухала еси вся грады и веси близлежащая града Праги, приводящи, елико ти мощно, люди

к вере Христовой и научаючи их воспевати Единому, в Троице славимому Богу: Аллилуия.

## **Икос 6**

В граде Праге и была еси мати милосердная возлюбленным чадом Церкви Православныя, досточудная угоднице Христова, блаженная Людмила, сердце бо твое на прошения и нужды приходящих к тебе милостиво открывала еси. Приими и нас, добрая мати, с любовью к тебе прибегающих и вопиющих сие:

Радуйся, яко сиротам была еси мати и вдовицам питательница; радуйся, яко нищим была еси милостивая подательница и обидимых благая защитница. Радуйся, со князем, супругом твоим, во благочестии пожившая; радуйся, чада твоя в страхе Божиим воспитавшая. Радуйся, яко благая отрасль твоя, святой князь Вячеслав, восприят мученическую кончину; радуйся, яко и той с праматерию своею вселися в царствие Небесное. Радуйся, за всех христиан пред Престолом Божиим верная молитвеннице; радуйся, ищущим пути ко спасению наставнице благодатная.

Радуйся, блаженная княгине Людмила, святая мученице и молитвеннице о душах наших.

## Кондак 7

---

Коль многими бисеры и камением драгоценным украшен есть венец, паче солнца сияяй, егоже дарова ти Господь, святая блаженная княгине Людмиле, ибо подвигом добрым во исповедании веры подвизалася еси и образ святого жития нам явила еси; сего ради прибегаем под кров твой, ищуще спасения, и благодарно о тебе вопием Богу: Аллилуия.

## Икос 7

---

Новое изобрете безчеловечие злочестивая невестка твоя Драгомира, бегущей тебе во град Тетин, укрытися хотящей от оныя, святая благоверная Людмиле. Та бо, наученная сатанинскою силою, погубити душу твою возжелавши позорною смертию, посла вслед ти двух злочестивых боляр, предати тя на лютая страдания, аки агницу Христову, зависти ради. Тии же собраша множество нечестиваго народа, взломаша двери дворца княжескаго и позорней смерти удавлением предаша непорочное тело твое. Мы же, воспоминающе страшную смерть твою, вопием ти сицевая:

Радуйся, блаженная Людмила, от злых боляр  
вервием удавленная по выи твоей; радуйся,  
таковым образом угодившая Богу,  
пострадавшая мученически. Радуйся, Господу  
душу предавшая в субботу, во едином часе  
нощи; радуйся, имевшая от рождения твоего  
шестьдесят и едино лето, Господем к мучению  
уготованная. Радуйся, яко тобою дивен Бог во  
святых Своих является; радуйся, яко мощи твоя  
прослави Господь нетлением благодатно.  
Радуйся, градов чешских и словацких похвало и  
утверждение; радуйся, всем носящим имя твое  
скорая помощнице и молитвеннице.

Радуйся, блаженная княгине Людмила, святая  
мученице и молитвеннице о душах наших.

### **Кондак 8**

---

Не может укрыться град, верху горы стояй,  
так, святая мученице Людмила, по кончине  
твоей прослави Господь мощи твоя и место  
погребения твоего, еже под градскою стеною  
града Тетина. Мы же тя, угодницу Божию,  
просим: буди нам ходатаица ко Господу о  
прощении грехов наших, да и мы, вкупе с  
тобою, Великому и Чудному Богу воспоим:  
Аллилуия.

## Икос 8

Вся была еси объята неизреченною радостью, блаженная мати Людмило, зрящи крещаемыя люди твоя, повелением Ангелов, и во умилении воздала еси хвалу Спасителю Богу, усердно моливши Его, да призрит на обратившия люди Своя, да утвердит их в вере и благочестии и да прославит Имя Свое в стране чешстей. Мы же, воспоминающе убо прерадостное событие сие, приносим ти благодарственныя и похвальныя песни:

Радуйся, неоскудеваяй источниче милостей к народу сему; радуйся, духовная наша мати, испросившая у Бога просвещение праотцем нашим. Радуйся, явлением на тебе силы Божия христианы возрадовавшая; радуйся, именем Всесильнаго Господа вся идолы в стране Чешстей сокрушившая. Радуйся, мученице Христова предобрая; радуйся, молитвеннице пред Богом чудная. Радуйся, яко демонов коварствие упразднися по молитвам твоим; радуйся, победы венец от руки Христа Жизнодавца приемшая.

Радуйся, блаженная княгине Людмило, святая мученице и молитвеннице о душах наших.

## Кондак 9

---

Во вся концы земли Чешския и за ея пределы прославися великоименитое имя твое, преблагостная мученице мати Людмило! Имела бо еси духа премудрости, яко мудрыми словесы безумных яве обуяла еси, и духа страха Божия, яко деяньми богоугодными душу очистила еси. Темже, представши Престолу Вышняго с сонмом Ангелов, купно воспеваеши Ему: Аллилуия.

## Икос 9

---

Ветии многовещаннии не могут достойно изобразити величие благодеяний твоих, святая мученице Людмило, стране Чешстей и иным странам идолопоклонства, идеже водворила еси Божественную веру, избавляющи люди от мрака языческаго и вечныя погибели, открывающи им путь ко спасению. Сего ради со благодарением благочестно поем ти:

Радуйся, к свету Православия душу свою обратившая; радуйся, многия в духовнем разуме просветившая. Радуйся, яко сердце твое на прошения и нужды приходящих к тебе открывала еси; радуйся, яко странники и нищия питала еси. Радуйся, яко с верою покланяемся

честней иконе твоей; радуйся, яко, чтуще память твою, восхваляем Господа. Радуйся, страданием твоим церковь Христову украсившая; радуйся, яко, взирающе на страдания твоя, вернии прославляют Имя Вышняго.

Радуйся, блаженная княгине Людмиле, святая мученице и молитвеннице о душах наших.

### **Кондак 10**

---

Спаستися всем преискренне желаючи, молишися за ны горе у Престола Господня, избраннице Христова, блаженная Людмиле, и твоими молитвами пособствуеши нам в странствовании многотруднем земнаго жития, еже сподоби ны в покаянии и благочестии скончати, яко облече тя Господь Божественною силою, да обратиши вся неверныя и научиши всех со умилением сердец воспевати Творцу Богу: Аллилуия.

### **Икос 10**

---

Стена явилася еси стране твоей несокрушимая, богомудрая Людмиле, и неборимая защитница всем призывающим тя, зане тако благоволи о тебе Небеси и земли

Творец Господь, прославляя угодницу Свою, яко при гробнице твоей совершашася знамения и чудеса, и изыде молва по всей стране, и понуди князя Вячеслава торжественно пренести нетленное тело твое из града Тетина во град Прагу, в сооруженную отцем его церковь святого великомученика Георгия. Мы же из глубины сердца со вздыханием к Богу глаголем ти песни таковыя:

Радуйся, молитвенница наша пред Богом теплая; радуйся, изыде бо по всей стране вещание о чудесех твоих. Радуйся, яко некий слепец прозре, егда прикоснуса земли с могилы твоея; радуйся, яко внук твой со славою пренесе честное тело твое. Радуйся, прославленная Богом на Небеси и на земли; радуйся, яко успение твое торжествует Церковь Православная. Радуйся, явлением мощей твоих младенческую Церковь Чешскую возвеселившая; радуйся, мученице Христова, и в земли Российстей и Сербстей зело почитаемая.

Радуйся, блаженная княгине Людмиле, святая мученице и молитвеннице о душах наших.

## Кондак 11

---

Пение умиленное приносим ти, угоднице Божия, и смиренно молим тя: моли о нас Единого Человеколюбца Бога, да не отвратит от нас Лица Своего и дарует нам по молитве твоей, святая мученице Людмила, прощение многих наших согрешений. Мы же, прославляюще Бога о тебе, вопием: Аллилуия.

## Икос 11

---

Светоносным Троическим сиянием горе осиянная, святая мученице Людмила, озари сердца наша, тьмою греховною покровенная, да елеем благих дел возжегше угасшия светильники наша, сподобимся внити в брачный чертог Христов, идеже ты веселишися и слышиши сия от нас благохваления:

Радуйся, предстоящи ныне Агнцу Божию в лице мученичеством; радуйся, яко и по преставлении твоём с нами пребываеши. Радуйся, луно, просвещенная от незаходимаго Солнца Правды; радуйся, путеводительнице, правую стезю к вечному спасению нам показующая. Радуйся, яко Христос по мучении твоём в чертог Свой тя всели; радуйся, яко, тебе

последующе, и мы царство Небесное обрящем. Радуйся, особливая покровительнице Чешскаго и Словацкаго народа православнаго; радуйся, о нас, сродных ти людех, присная пред Богом молитвеннице.

Радуйся, блаженная княгине Людмиле, святая мученице и молитвеннице о душах наших.

### **Кондак 12**

---

Благодать Пресвятаго Духа испроси нам, угоднице Христова, святая мученице Людмиле, от Всещедраго Бога и Спаса нашего, вразумляющую и укрепляющую нас в деле спасения, да не бесплодно будет в нас всеянное тобою семя святых веры, но да прозябнет и плод достоин сотворит, имже препитаем души наша до будущия жизни и со всеми святыми воспоем Богу песнь: Аллилуия.

### **Икос 12**

---

Поюще твое преставление, ублажаем мученическую кончину и почитаем память твою, святая мученице мати Людмиле, многомогущая заступнице земли Чешския, Словацкия и Сербския, буди же и о российских

людех благая молитвенница ко Господу, да вопием ти:

Радуйся, благодатию Святаго Духа одеянная; радуйся, представшая Живущему во свете неприступнем. Радуйся, вдовицам правило богоугодного жития; радуйся, теплая ходатаице, всем православным от Бога дарованная. Радуйся, соучастнице на Небеси жребия праведников веры Христовы; радуйся, со святыми Божиими Трисвятую песнь воспевати сподобльшаяся. Радуйся, от Господа всех благ нам, молящимся ти, подательнице; радуйся, яко всем православным христианом, тя молитвенно призывающим, на помощь скоро притекаеши.

Радуйся, блаженная княгине Людмиле, святая мученице и молитвеннице о душах наших.

### **Кондак 13**

О святая мученице и верная угоднице Христова Людмиле! Малое сие песнословие от нас приемлющи, моли милостиваго Бога нашего, да вселится и возблагоухает в сердцах наших святыня Православныя веры, да умножится в житии нашем елей дел благих, да не угаснут светильницы наши в полунощный час сретения Небеснаго Жениха и да сподобимся купно с

тобою выну воспевати Ему в вечнем царствии:  
Аллилуия.

(Этот кондак читается трижды, затем икос 1  
и кондак 1)

## МОЛИТВА

---

О святая угоднице Христова, мученице княгине Людмиле, первоугоднице Чешския страны и стольнаго града Праги украшение, теплая о нас пред Богом молитвеннице! Се мы, многогрешнии, смиренно припадающе, молим тя: не попусти нам погибнути в тине грехов наших, но вознеси о нас моление ко Господу, да помилует нас и дарует нам покаяние. О преблагая мати Людмиле! Не забуди посещати чад твоих, аще бо и преставилася еси от нас в Небесныя обители, вкупе со внуком твоим, святым мучеником Вячеславом. Темже, святая прамати его, испроси и нам, грешным, Божие благословение на чада наша и на всех нас, да и мы, многогрешнии, возблагодарим Господа за подаяние Его благодати и купно с тобою да прославим Отца и Сына и Святаго Духа и твое великое заступление о нас во веки веков. Аминь.